

Tranquilidad na Aruba parce no ta cerca

Nan a puntrami awe kico mi ta pensa di e caso Natalee Holloway. Mi a duna un comentario dos siman pasa y despues nada mas. Laga autoridadnan haci nan trabao y ora cu nan ta cla, lo tende si a solucion a e caso si of no y kico autoridadnan tin. Nos ta especulando di mas te cu esaki a bira "desgasta".

E VERGUENZA DEN PARLAMENTO

Atrobe nos a haya un di e payasadan grandi di parlamento. Mi no ta kere ningun momento cu ta spontaneo e trahadonan di Postkantoor a bay ey nan.

Nan tin derecho di bay scucha reunion di parlamento y tin derecho di ta eyden, pero pa sala di parlamento y pa publico tin reglamentonan tambe cu mester atene na dje.

Si e publico a lanta, canta himno, zundra, grita etc., ta kende a duna nan e ehempel y forza?

No ta e politiconan mes, cu a usa e tactica aki pa añanan largo cu nan seguidor nan?

No ta politiconan mes (principalmente ora nan ta den oposicion) cu ta probecha di situacionnan pa crea discordia?

E falta di respet a bay asina leu cu por a mira con un parlamentario mes ta cohe palo di bandera patras di lomba di president di Parlamento den un forma menazante.

E no a cohe e bandera aki pa proteha e bandera. Ta otro pensamiento tabata tin tras di esaki sigur.

Den tur e bululu nan cu nos a experiencia den parlamento ultimo 10 pa 20 aña, no ta politiconan mes ta tras di tur esaki, scondi tras di esnan cu nan ta manda?

Nan ta usa un tema como arma, pa lucha contra gobernantenan, y cu e tema populista nan tras como defensa, nan ta cende e candela.

Tur e tipo di demostracionnan aki ta wordo fomenta pa politiconan y partidonan mes.

Hopi biaha hasta sindicatonan ta tras di esakinan y ta laba man.

Tur lo desmenti esaki. Tur partido lo desmenti esaki. Tur parlamentario lo desmenti esaki.

Esnan den e bululu riba tribuna lo desmenti esaki, pasobra ta nan interes ta bin na prome lugar.

Ordo, respet y normanan di nos isla a wordo perdi y hasta den parlamento.

Y despues?????

Ta pa nan mes nos lo bolbe vota. **Esey ta Aruba!!**

NOS TA VOTA PA PARTIDO Y NO PA PERSONA

Nos sistema di eligi parlamentarionan ta mas bien un sistema planifica y planea pa partidonan y no pa candidatonan.

Mi no ta bay directo riba esey, pero lo tira un bista riba candidatonan.

Riba lista di AVP, candidato 3A, 4B y 7C no ta cay na mi agrado. Riba lista di MEP mi no ta contento cu candidato 2F, 5 G ni 8 D.

Riba lista di OLA mi no ta gusta 2C, riba lista DR candidato 2L, 3K y 4 V no ta na mi agrado, y riba lista RED 2S y 3 T tampoco.

Pakico? Pasobra mi no ta mira e personanan aki como personanan cu ta "digno" pa ta parlamentario y "limpi" pa ta ministro o parlamentario.

Esey ta pasobra mi conoce nan, mi sa kende nan ta. Mi sa di e tanto cara cu nan tin. Mi sa cu pa nan "AMI" ta bin prome cu "ABO". Esta, tur cos pa nan prome.

Nan ta riba lista, pero ta ami y un man yen di hende sa di nan. Nos sa kende nan ta, mescos cu esnan cu a anda cu nan como colega, compañero, nan hefe o no, cu nan como hefe o no, como profesional riba un of otro tereno, pero cu seis cara.

E resto di nos isla no sa esey, pasobra e candidatonan aki nunca a wordo aresta, deteni, bin dilanti corte y wordo sentencia. Pues.....

Nan ta limpi y integro!!

Ami si sa cu no ta asina y esnan cu sa tampoco por convence otro hende di esaki.

Awor..... **Con cu mi vota, e personanan aki ta bin den Parlamento toch!**

Si mayoria no vota riba nan, debi na nan posicion riba lista, nan ta bira parlamentario toch, pasobra ta pa e partido ta vota.

Ta e partido ta haya e votonan, y nan ta drenta parlamento segun votonan total di e partido.

Nan no ta drenta Parlamento, segun e total di voto cu nan haya. Solamente si nan pasa e barera di "voorkeursstemmen", y esaki tambe ta depende di esnan cu ta riba lista prome cu nan segun number.

Ora nan drenta parlamento, **ta peor nos isla ta sigui bira, keremi!**

E OTRO SORTO DI CANDIDATO

Bo ta scucha nombrenan cu ta subi lista di partidonan y bo ta puntra bo mes: **"Kico Shorombo ta bay haci riba lista?"**

Pa yega pa ta parlamentario manera debe ser, ta hopi aña e lo tin cu cana cu e partido prome. No ta cos di djis drenta y mañan bo sa mas cu tur hende riba e isla aki.

Nan no ta sirbi pa ta ministro.

Nan no tin e educacion pa ta un ministro (di cartera di peso), ni di ministerionan mas facil pa maneha.

No..... **nan ta personanan cu ta ser usa!**

Nan ta ser usa pa logra haya voto riba nan cabez.

Di otro banda, si e partido gana, y nan no ta eligi, nan no tin cu worry.

Partido lo percura pa mehora nan posicion di bida.. pesey nan a acepta pa ta candidato.

Nan posicion di bida ta mehor sea cu trabao den gobierno, cu salario halto (di recompensa pa candidatura y voto) of nan lo bira consehero of coordinador. (Ministro tin ambtenaar califica toch pa conseha su persona y yude coordina su trabao).

Pero despues di Ministro, ta net e personanan aki ta esnan cu tin mas poder.

CAMBIO TA NA CAMINDA DEN POLITICA

Cambio ta na caminda den politica, ta locual nos tin mas di 15 aña ta tende.

Awe nos ta den e mes sistema di politica di 40 aña pasa. **Nada a cambia!! NADA!!**

Den e gobierno cu ta bay sinta mañan, **NADA** lo cambia den e sistema di hiba politica y di gobernacion. Mi no ta mira esaki. Ta eleccion tin cu dicide.

Pero cual eleccion, y cual politiconan? Politiconan cu tey caba? Politiconan nobo? Partidonan cu tey caba? Partidonan nobo?

Aruba ta den un situacion caminda tur cos ta saliendo for di man, riba tur tereno, y ta peor e ta keda bira, tuma mi palabra.

JULI TA E LUNA

Juli ta bay bira e luna di gritamento.

Juli ta e luna cu Postkantoor ta bira NV y cu lo tin mas gritamento. No ta manera un politico a expresa cu despues di juli lo draai e holoshi ey back. **E holoshi no ta DRAAI back NUNCA** ta un direccion e ta draai.

Na Juli ta bin e problema grandi di SUSHI.

E problema cu ta pone hotelnan y tur empresa cuminsa grita ora e cobramiento di sushi drenta na vigor pa nan y cu tin cu cuminsa kita trahador pa loco pasobra no por paga loke gobierno kier cobra pa tira sushi afo.

E bom aki ta na caminda, spera riba dje!

Juby Naar.

ANLY Printing N.V.

ENGELANDSTRAAT # 2
TEL./FAX: 583-6732

BARATILLO BARATILLO BARATILLO

Anly Printing N.V. tin Polo-Shirt den diferente color y tamaño pa solamente Afl. 5,-. Nos mester espacio pa pone mercancía nobo !!! Pasa liher.... Nan ta bai manera pan cayente.

ECONOMY

CAR RENTAL

SUPER SALE

Bushiri 27
(patras di City One)

2 Daihatsu Cuore 2002

Automatic - Airco - Afls. 8.500

4 Suzuki Jimny 2002 - Afls. 7.950

Tur e autonan aki a haña nan servicio completo segun manual ariba 5.000 y 10.000 km.

PA MAS INFORMACION YAMA Tel: 583-0200